

**Inatsimmik naammattumik qulakkeerinnittumik meeqqat angerlarsimaffiup avataanut inissinneqartut taakkunungalu angajoqqaajusut Naalagaaffiit Peqatigiit Meeqqat pillugit isumaqatigiissutaat malillugit sullinneqartarnissaat pillugu Naalakkersuisut nalunaarusiamik suliaqarnissaannik Inatsisartut aalajangiiffigisassaattut siunnersuut (Inatsisartunut ilaasorta, Anna Wangenheim, Demokraatit)**

### **Akissuteqaat**

(Meeqqanut, Inuusuttunut Ilaqutariinnullu Naalakkersuisoq)

### **Siullermeerneqarnera**

Aalajangiiffigisassatut siunnersuummut pingaaruteqartumut qujanaq.

Naalakkersuisut meeqqat tamarmik toqqissisimasumik peroriartornissaat ukkataraat. Inuit meeqqamut isumassuisut toqqissisimasumik peroriartortitseqataasutut inisseqqasut, toqqissisimasumik peroriartornermi ilusilersueqataasuupput. Inuit isumassuisut angajoqqaajusinnaapput, aanaa-/aataakkuusinnaapput, ilaquuttat ikinngutigisinnaavaat, ulloq unnuarlu- aamma ulluunerani paaqqinnittarfimmi sulisuusinnaapput kiisalu atuarfimmi sunngiffimmilu aaqqissuussani sulisuusinnaallutik.

Taamaattumik meeqqat isiginninnerannut inunnullu isumassuisunut, meeqqanut isumassuisunut Naalakkersuisut ukkatarinnipput. Tamannalu angajoqqaat pingaaruteqartutut inissisimanerannik tapersersuineq sallinneqartorujussuunera pissutaavoq.

Meeraq angerlarsimaffiup avataanut inissinneqarpat, ilaquataanut attaveqarneq attatiinnarneqassaaq, - tamanna meeqqamut pitsaanerpaatut naapertuutsillugu. Taamatullu meeqqamut tulluurtunik sinaakkutinik angajoqqaat pilersitsisinnaanissaannut tapersersorneqassapput, taamaasilluni meeraq angerlaqqissinnaaniassammat.

Meeqqat pisinnaatitaaffii pillugit Naalagaaffiit Peqatigiit isumaqatigiissutaat eqqarsaatigalugu inatsisitigut sinaakkutit sukumiinerusumik misissussallugit naapertuuppoq. Naalakkersuisut una aalajangiiffigisassatut siunnersuut akuersaarpat.

Aammattaaq upernaq manna ulloq unnuarlu paaqqinnittarfeqarfimmi periusissiaq, ukiunut qulinut tulluuttunut atuuttusaaq, Naalakkersuisunit kikkunnut tamanut saqqummiunneqartusaaq ilisimatitsissutigineqarsinnaavoq. VIVE-p Kalaallit Nunaanni ulloq unnuarlu paaqqinnittarfiit pillugit qulaajaanera kikkunnut tamanut saqqummiunneqareernerata kingorna 2020-mili sulineq ingerlasimavoq aamma periusissiamik suliaqarnermi susasaqartut attuumassutillit amerlasuut peqataasimapput. Meeqqamut ilaqtariinneq pingaarnerpaajusoq aamma meeqqanut inissinneqarsimasunut angajoqqaat angajoqqaanermut piginnaasaat nukittorsarneqassasut kiisalu angajoqqaatut suleqatigiinneq qitiutinneqassasoq periusissiami uani qitiulluinnartuuvoq.

Taamatut oqaaseqaateqarlutik uuma aalajangiiffigisassatut siunnersuutit akuersissutigineqarnissaannik Naalakkersuisut inassuteqarput.